

1 TESALONIKA

Wimaamala

¹ Geka tauyai Paulo ma Sailasa ma Timoti omi leta to gilumiyahi taumi tu witumagana bolumi Tesalonika tuponana uyahimi, babana taumi Yaubada Amata ma ata Guyau Yesu Keliso hai gali u hinena o memae.

Hai lunugotootogo po hai nugodumola hina melabenimi.

Mi Tesalonika hai dewa hi haki duma

² Houga magomagouna i lupali uyahihhi to imaa-mala Yaubada uyahina atapuma ubeimi.

³ Ma houga magomagouna Yaubada Amata u matana to laupali ubeimi, babana omi witumaganagei o bagibagi imahi po omi lounugotootogoei lawa o haguhi po Guyau Yesu Keliso a pali-witumagana ubeimi o yamtaibagibagigeya.

⁴ Walewalehiyai, to hanapugeya Yaubada i luhogalena dumami yaka i winaganimi po taumi a lawa.

⁵ Hougana to lauguguya ega i baha yawa ma, Alugo Woiyawa bahana i wikadidili uyahimi po bahana o witumagananya. Tauyai i mae u hayami o galena tuhagaya.

⁶ Uyahinei o witutupoganeiyai yaka gasi ata Guyau o itutupogananya. Lolowa Yesu tuwegana o nonoli yaka witai o tuhagaya ma tamogi anai kaohami o wotagoya babana kaohana Alugo Woiyawa uyahinei i nei.

⁷ Uyahinei taumi ani galena dewadewana Keliso tu witumaganena Masedoniya ma Giliki tupo-hihi uyahinei.

⁸ Taumi uyahimiyei ata Guyau tuwegana amaka i nohaya mi Masedoniya po mi Giliki uyahinei, ma taumi gasi omi witumagana Yaubada uyahina tuwegana i nohaya tupo atapuhi uyahinei. Uyahinei tupo awai uyahina to nenea ega emoemotana po bimiyei tona ibaabani,

⁹ babana tauhi uyahiyai he ibaabani bimiyei hi pa, ‘Lolowa o nenea mi Tesalonika uyahinei po hi kaohena dumami po hai ani witumagana koyakoyama hi wihinigigiyei ma Yaubada uyahina hi palihalena mehi babana tauna tunawana Yaubada dumana po waiyautuna tauna uyahina hi nugobui po binei hi woobagibagi,

¹⁰ po gasi Natuna hi iotonaneya houga awai apo yadei ina hopu mai.’ Babana Yesu hilagei i witowolo meya apo yohola ina nei po Yaubada a uyogigai uyahinei ina halota.

2

Paulo a bagibagi Tesalonika u meyageina

¹ Walewalehiyai, o hanapugeya lolowa i witoumana uyahimi ega tota ibaabani yababa ma anai anona.

² O hanapugeiyai mi Pilipai hi wiapapoeniayai po to wihinimaya ma Yaubada i wikadidiliyai po tuwega dewadewana uyahimi to bahebaheya hawena wiywana to tuhagaya.

³ Ma to lauguguya uyahimi ega tota koyakoyamemi gapola luhogalahi ubeihi ma tamogi baha dumana to ibaabaniyeya uyahimi.

4 Babana Yaubada i kawaidewedeweiyei po bagibagi geka i palihaleya uyahiyai po ipa tuwega dewadewana to bahena geleteya uyahimi yaka i bagibagina ega ipa lawa to laikaoohahi ma Yaubada to likaoohaya, babana nugenugoyai hinena Yaubada i hanapugeya.

5 Lolowa to nenehi uyahimi ega ipa i baha dagihagei ma nugenugomi to waya, ma tamogi Yaubada a baha dumadumaluhiyei to palipaliwelemi ma Yaubada i hanapugeya, ega tota kawakamone uyahimi po ipa omi gapola to tamihi, eega.

6 Ma u matami po lawa gehouhi u matahi i dewa to dewadewahi ega ipa ona huneiayi.

7 Tauyai Keliso a tu wituwituwega yaka emoe-motiyai ipa uyahimi to taniwaga ma tamogi eega. Tauyai i dewa ipa to nugohegoya uyahimi po mei wawine natunatuna uyahiji e nugenugohegoya.

8 To luhogalena dumami yaka to nugenahalena meiyai uyahimi. I luhogala bimiyei ma Yaubada tuwegana anai kaokaoyai to paliwelemi ma tauyai gasi to palihalena meiyai uyahimi.

9 Walewalehiyai, lolowa i bagibagi uyahimi amaka o galeiyai iyeta po ididibala to bagibagi kadidili duma po Yaubada tuwegana to ipaliweleneya uyahimi, ma tamogi tunawiyai i am to galena iteteya babana ega tota luhogaleya ipa to ligenomi i am galena itetena binei.

10 Taumi i dewa u hayami amaka o hanapugeya ma Yaubada gasi i hanapugeya i dewa to wiwoiyawehi po hi dumalu po hi haki wahaga.

11 Babana atapumina to gagalena itetemi mei lawa natunatuna e gagalena itetehi,

12 ma to wiututu lulougo uyahimi po to wika-didilimi ma to paliwelemi ipa ona dewa imahi babana Yaubada i inaganimi tauna anani taniwaga po a wasawasa binei.

13 Houga magomagouna Yaubada uyahina to imaamala, babana Yaubada a baha o nonoli po uyahina o palihalena memi babana tauyai ega i baha ma naka Yaubada a baha. Uyahinei o witumaganeya po a wipoya o tuhagaya.

14 Walewalehiyai, mae witewiteihi amaka o tuhagahi naka pitenana gasi tauhi Yesu Keliso a bolu gehouhi Yudeya tuponana uyahina. Tauhi witai he tutuhagahi hai dobu lawahi uyahiihiyei, mei taumi witai o tutuhagaya taumi omi dobu lawahi uyahiihiyei.

15 Geka dewana mi Yudeya hai dewa dumana, uyahinei ata Guyau Yesu hi lihilageni, ma tu bahapiko odubohi hi ununihi ma tauyai gasi hi wigawiyeyai uyahinei Yaubada ega ita kaoha matababana lawa magomagouhi he ihinigigiyei.

16 Mei gasi i wipaliwelena taumi ega mi Yudeya uyahimi, he iletami ipa iyowai ma hina lugudumi babana ega nugonugohi ipa Yaubada ina wiluyawahimi. Uyahinei apapoe i lihogo dumahi yaka Yaubada a uyogigai amaka hi wialoni.

Paulo i luhogaleya ipa ina weludadana mehi

17 Walewalehiyai, lolowa to nenehalemi to nugu-dubu duma babana ega houga gehouna tota galemi, ma yohola to nugonugotuhumi ega tota winugoguluwimi, uyahinei ma to iletam ipa iyowai ma to nehi po to galena memi.

¹⁸ I luhogala ipa to nehi uyahimi. Tau Paulo a wileta duma ipa a nehi po a weludadanimi, ma houga magomagouna a ileta po ega emoemotau, babana Tomodulele u tahaya i guduya.

¹⁹ Guyau Yesu a houga gunawilana uyahina, taumi bimiyei apo kaoha to wialoni babana omi witumagana binei apo meiha diidigana to tuhagaya.

²⁰ Uyahinei taumi i ani wotalagae ma i ani kaoha.

3

¹ Hougana u Ateni a memae, ma a winugow-ilawila duma bimiyei, po ega yaka a baha a pa, nugote Timoti a himili po ina nae Tesalonika ma tau tunawau geka hota a memae.

² Ega yaka walehita Timoti a himili po i nehi, babana tauna Yaubada a tu bagibagi, Keliso tuwegana uyahinei ipa ina wikadidilimi po Keliso uyahina ona witumagana imahi

³ po geka witeihi uyahihie ega ona tapitapiya. Witeihi amaka o hanapugehi naka ta tutuhagahi.

⁴ Babana lolowa ta memegogona ma to bahebahena nonogogeya to pa, ‘Pilipili uyahimi apo hina geleta’; ee, geka hougahi amaka he gelegeleta.

⁵ Naka binei ma a inugowilawila babana a matouta duma Tomodulele uyahina meka po apo ludadana baneina ina welewelemi po ona tapiya po lolowa i bagibagi uyahimi ina wiapapoeya. Uyahinei Timoti a himiliyahi po ipa omi witumagana ina galeya ma tuwegami ina neiyai uyahiu.

⁶ Timoti i nehi uyahimi ma i gunawileya po tuwegami i paliweleu i pa, ‘Mi Tesalonika

Keliso hi witumaganena dumaya po hi luhogalena imahiyeya, ma lolowa ata toumana uyahihouga magomagouna anai kaohahi he nugenugotuhuya ma hi luhogaleya ipa hina galena mem.' Tau gasi u luhogala ipa a galena memi.

⁷ Walewalehiu, omi witumagana binei, tuwegami a noonoli po i likaoha dumau po ega mei pilipili po witai u hinena a memae.

⁸ Uyahinei omi towolo momota Guyau binei u ani kaoha.

⁹ Yaka i omhuna Yaubada uyahina i kokoe baba u kaoha bimiyei i lata duma Yaubada u matana.

¹⁰ Uyahinei ma iyeta po ididibala a laupali kadicili ipa iyowai ma tepami a galena mehi po apo tu witumagana tapitapiya omi ututu a lawi po ona kadicili.

¹¹ Yaka geka i lupali ipa Yaubada Amata ma ata Guyau Yesu i tahaya hina hoeya yaka apo to nehi uyahimi.

¹² Ma Guyau a luhogalagei ina ligoholimi po tunawami ona lauhogalena memi po lawa gehouhi ona luhogalehi po mei tauyai to lauhogalemi pite,

¹³ po meka hougana ata Guyau Yesu tu wiwoiyawena mitehi hina hopuhopu mai taumi anai nugokadidilimi po anai nugoyeuyeumi po anai woiyawami Yaubada Amata u matana ona towolo geleta.

4

Yaubada dewa dewadewana i luhogaleya

¹ Walewalehiyai, geka ginouli waimulina, lolowa dewa to iatatiyemi ipa Yaubada ona likaohaya po geka hougahi amaka o wootagohi yaka ega ona wohouna ma ipa Guyau Yesu binei ona dewadewa gawahi.

² Ma ata Guyau Yesu a taniwaga amaka a welemei po o hanapugehi.

³ Yaubada a nugotuhugei ipa omi mae hina wiwoiyawa ma ega matamaga a tupo uyahina ona nenaе.

⁴ Ma emosi po emosi ona tawitawine omi dewa dewadewahi po dumadumaluhi uyahihiyei.

⁵ Ma ega ipa anai luhogala gobugobumi po mei lawa ega Yaubada hita hanahanapugeya.

⁶ Ma ega lawa gehouhi agagohi ona halohalohi meka po apo Guyau a wimeiha ona tuhagaya. Geka ginoulihi ubeihi lolowa a baha kadidili uyahimi.

⁷ Matababana geegeka, Yaubada i inaganita ega dewa gobugobuhi ubeihi ma dewa waiwoiyawah ubeihi.

⁸ Uyahinei apo iyai lugagayo geka ina wihinigigiyea naka ega lawa hai lugagayo ita ihinigigiyea ma Yaubada a lugagayo e ihinigigiyea, ma Yaubadana Alugo Woiyawa e weleweleta.

⁹ Ma apega luhogala binei an'omgiluma nehi, babana Yaubada tauna amaka i wiatatiyemi po emosi po emosi o lauhogalena memi.

¹⁰ Naka pite gasi walewalehita tupo Masedoniya u hinena amaka o lauhogalehi uyahinei ma a laihunami ipa omi luhogalana gawagawata.

11 Ma ona wileta po anai nugodumolami ona memae po tunawami omi bagibagi nimamiyei ona dewadewahi ma ega lawa hai bagibagi ona iyalutugehi mei lolowa a palipaliweleme pite.

12 Uyahinei taumi omi mae binei ega lawa gehouhi uyahihia ona lauwahala yaka apo tu me-uputa hina wiyatayatemi.

Guyau a gunawilana binei

13 Walewalehiu, ega ona inugoneina tu hilahilage ubeihi. Uyahinei apo tulata awai ina hilahilage ega ona nugenugodubu duma po mei tauhi ega hai witumagana towolo meme uyahina.

14 Ma tauta Yesu ta witumaganeya naka hilage uyahinei i towolo meme, po Yaubada ta witumaganeya ata lawa tu nugenubui hi hilahilage apo Yesu mitehi ina weluwinihi.

15 Geka ata Guyau a baha to ipaliweleneya uyahimi, apo a houga gunawilana uyahina tauhi tu hilahilage apo Keliso hina tuhaga tahaeya ma tauta a yaututa apo ta wimuli.

16 Guyau Yesu ponana apo ina lata po ina hopuhopu mai, tu winoyanoya mi yadena hai tu weluweluwai ponana apo ina lata ma ina iototu po Yaubada a himogo apo hina huweni po gololona ina lata duma. Ma Guyau yada uyahinei ina hopuhopu mai ma tu hilahilage lolowa Keliso hi itumaganeya apo hina towolo meme.

17 Apoma tauta a yaututa hoi hipuli ta memae mitehi ta gae hoi yada po ata Guyau mitehi ta witutuhaga yaloi uyahihia po tauna mitehi ta mewahaga.

18 Tuwega geka ona deedeya tu nugodubu emosi po emosi u hayami, ani likaohami.

5

1 Walewalehiu, ega emoemotana po geka omi letana uyahina Keliso a houga nei a paliwelemi po ona hanapugeya,

2 babana a houga nei ega iyai gehouna ita hanapugeya. Guyau a nei galenana mei tu danene uguwa bolinai apo ina nei po ina ligoholita.

3 Apo lawa hina pa, ‘Houga dewadewa amaka i geleta,’ po anai kaohahi hina memae, ma naka hougana wiyuwa baneina apo ina laigoholihi mei wawine a houga wigunaguna hougana. Uyahinei wiyuwa naka ega emoemotahi po hina lowo haleya.

4 Ma walewalehiu, taumi uguwa a tupo uyahina ega ota memae yaka wiyuwa hougana apegia ina ligoholimi po ona matouta.

5 Babana tauta yayata tu miyena yaka ipa yayatagei ta nena, ma ega uguwa dewana uyahinei ta nena.

6 Uyahinei ega ipa ta lauhinibegabega po mei lawa boluhi he lauhinibegabega pite, ma ipa Yesu tana iotonaneya nugonugota anai dumadumaluhi.

7 Ma tauta ega ipa mei tu matagiba, po goila kadikadidilina tu umaumahi tauhi uguwa dewahi tu bagibagiyeji.

8 Ma tauta nugonugota hi laugiigilihi ta galena itete meta, po ata witumagana ma ata luhogala uyahihiyei nugonugota tu wigawiyena

ta guduguduya po Yaubada a paliwitumaganana
ata luyagohana binei ata nugotuhu ta lugaagalih.

⁹ Babana Yaubada ega ita winaganita a uyogigai
iyetana binei, ma ipa ata Guyau Yesu Keliso a
luyagohana ta waya.

¹⁰ Naka tepanei Keliso i hilage ubeita, uyahinei
apo hilahilageta bo a yaututa apo tauna mitehi ta
mewahaga.

¹¹ Uyahinei emosi po emosi ona ikadidili memi
po ona haguhagu memi mei amaka o dewadewahi
pite.

Guguya anani kokoe

¹²⁻¹³ Walewalehiyai, to lupaliyemi ipa omi tan-
itaniwaga ona wiyatayatehi po ona luhogalena
dumahi, babana Guyau a bagibagi he dewade-
waya uyahimi he iututu lulougo ma he gagalena
itetemi. Uyahinei ega ona itona ma nugodumola
uyahina ona memae.

¹⁴ Walewalehiyai, to laihunahunami ipa tu lu-
upudoodola ona baha kadidili uyahiji ma tu
lowolowo ona winugokadidilihi, ma tu tapitapiya
ona haguhuhi, ma lawa atapuhi ubeihi omtaibag-
ibagiei ona wobagibagi.

¹⁵ Apo iyai ina iapapoenimi ega ona imiheya
ma houga magomagouna ona lauhogala po ona
ihaguhagu. Omi lawa dumahi po lawa gehouhi
ona haguhaguhuhi.

¹⁶ Houga magomagouna ona kaokaoha.

¹⁷ Ma houga magomagouna ona laupali
Yaubada uyahina.

¹⁸ Ginouli atapuhi ubeihi Yaubada uyahina ona imaanala, babana dewa geka pitenana Yaubada a nugotuhu tauta Yesu Keliso a bolu ubeita.

¹⁹ Ma Alugo Woiyawa a bagibagi uyahimi ega ona bohobohoya.

²⁰ Apo lawa gehouna Yaubada a nugotuhugei ina bahabaha piko ega ona ihinigigiyeya.

²¹ Ma a wiatatiyanana ona ludadani po ina dewadewa yaka ona wotagoya.

²² Ma apapoe atapuhi ona wihinigigiyehi.

²³ Nugonugou ipa Yaubada a nugodewagei ina liyeuyeumi po ona palihalena memi u nimana uyahinei apo alugomi po nagonugomi po hinimi ina galena itetehi po ega apapoe ona tutuhagaya a siga Yesu Keliso ina gunawilena meya.

²⁴ Geka binei ma Yaubada i otugemi, tauna Tu dumalu yaka awai i bahebaheya apo ina dewaya uyahimi.

²⁵ Walewalehiu, Yaubada uyahina ona laupali ubeiyai.

²⁶ Ma i wimaamala walewalehita atapuhi i wini-uyagona waiwoiyawana uyahinei.

²⁷ Yaubada gowanei a lupaliyemi ipa geka letana walewalehita atapuhi u matahi ona hiyawwi.

²⁸ Ata Guyau Yesu Keliso a lounugotootogo ina melabenimi.

**YAUBADA A WOGATALA WOUNA
The New Testament in the Tawala language of Papua
New Guinea**

Nupela Testamen long tokples Tawala long Niugini

copyright © 1985, 2014 Wycliffe Bible Translators, Inc. and Bible Society of Papua New Guinea

Language: Tawala

Translation by: Wycliffe Bible Translators

Text © 1985, 2014 Wycliffe Bible Translators, Inc.; 2014 print edition © Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

PDF generated using Haiola and XeLaTeX on 28 Dec 2024 from source files
dated 31 Aug 2023

03dd8e7f-64f4-5464-abd5-5e08202f0f29